

ILEI raportas

Raportas la Prezidanto kaj la Estraro de ILEI pri trimonata agado, de 2018-07-15 ĝis 2018-10-15.

Vivo de la Ligo Eventoj

Kongresoj

La 51-a ILEI-kongreso en Madrido, Hispanio

La ĉefa evento de la nuna raportperiodo, certe, estis la 51-a ILEI-kongreso en Madrido, Hispanio. Ĝi estis sukcesa, absolute rekorda laŭ la kvanto de aliĝintoj kaj partoprenintoj kaj novtipa pro unuigo de du kongresoj samtempe. Dum la evento la prezidanto sendis kvar gazetarajn komunikojn. La detalaj raportoj aperis en IPR 2018/3, en Juna Amiko 2018/3. Aldone, fine de aŭgusto, LKK en Madrido faris raporton pri la kongresa statistiko kaj detalan analizon de la enketo, kiun ricevis kaj plenumis dum la kongresoj iliaj partoprenintoj. Tiu ĉi resumo estis dissendita al ĉiuj partoprenintoj.

Krome, kiel kutime, la estraranoj, kiuj ĉeestis la kongreson, esploris diversajn opiniojn pri ĝi kaj faris konkludojn por la sekvaj kongresoj.

La 52-a ILEI-kongreso en Ĉaĉak, Serbio, 2019

Survojas preparado de la 52-a ILEI-kongreso en Ĉaĉak, Serbio. La Estraro intencas iom modifi la paĝaron de ILEI, inkluzive paĝon pri kongresoj, pripensas estontan emblemon de la kongreso kaj trovis finfine trafan formulon por la kongresa temo, kiu povus interesi kiel la Ligon ILEI, tiel la gastigonton – la Fakultaton de Teknikaj Sciencoj en Ĉaĉak apartenantan al la Universitato de Kragujevac. La estrarano pri kongresoj Radojica Petrović traktas la aferon kun la universitato de Ĉaĉak, kiu estas lia loĝurbo. Li, kiel kutime, preparis la anoncon kaj aliĝilon por aperigo en IPR 2018/3.

Venontaj kongresoj

La Estraro dense esploras pri la loko por la 53-a ILEI-kongreso en 2020 kaj pri la eventualaj temoj, alogaj por ILEI kaj por universitata medio.

Komisiono pri universitata agado

Post la ILEI-kongreso en Madrido kaj la Nitobe-simpozio en Lisbono aperis nova konsisto de la Komisiono pri Universitata Agado de ILEI. Aldoniĝis D-ro Vicente Manzano Arrondo, profesoro pri psikologio en la universitato de Sevilla, Hispanio. Li estis efike aktiva dum la madrida kongreso kaj la lisbona simpozio. Ni deziru fruktodonan agadon al la nova komisiono! Alia pozitiva fakto estas la elekto de D-

ino Angela Tellier kadre de ESF por universitata agado. (ESF = Esperantic Studies Foundation) Jam kontaktoj inter ŝi kaj la Komisiono komenciĝis.

Salutmesaĝoj de ILEI

LA Prezidantino Mireille Grosjean laŭvice sendis salutmesaĝojn al SES en Liptovský Mikuláš, Slovakio, al SAT-kongreso en Ĉaĉak, Serbio kaj al IJK en Badajos, Hispanio, al niaj brazilaj kaj hungaraj samideanoj okaze de iliaj seminario kaj kunveno de la landaj sekcioj.

Deklaro pri privateco

Septembre la Prezidantino Mireille Grosjean trasendis al la sekcioj kaj reprezentantoj la Deklaron de ILEI pri privateco. Ĉar la Ligo havas sian juran sidejon en Roterdamo, Nederlando, ILEI devas sekvi la postulojn de Eŭropa Unio. Mireille adaptis la eŭropan deklaron al kondiĉoj de la Ligo kaj nun ILEI havas sian propran Deklaron pri privateco kongrue kun eŭropaj postuloj.

Okaze de la **Tutmonda Tago de Instruistoj**, la 5-an de oktobro, la Prezidantino sendis salutmesaĝon al la sekcioj, reprezentantoj kaj ĉiuj Eo-instruistoj. En ĝi ŝi atentigis niajn samideanojn pri la ĉefa temo de la ĉi-jara festo flanke de UNESKO: “Rajto al edukado estas rajto al kompetenta instruisto”. Mirejo donis siajn opiniojn pri defioj de nuntempa edukado.

Okaze de la alproksimiĝanta Tago de la Libro 2018, dum kiu ILEI tradicie organizas **Komunan Legadon**, la Prezidantino Mireille Grosjean proponis tekston por la komuna legado. Temas pri la poemo de Julian Hernandez Angulo el Kubo, kiun li deklamis fine de sia prezento en la Tago de la Lernado dum la 51-a ILEI-kongreso en Madrido. La partoprenantoj de UK povis ankaŭ aŭdis tiun deklamon okaze de la Internacia Arta Vespero.

Poezio tutlibera estas konkurso lanĉita de la franca edukministrejo. En 2018 la konkurso estis malfermita al poemoj en Esperanto. La prezidanto de ILEI diskonigis la regularon de la konkurso tra la kutimaj kanaloj kaj la partopreno estis sukcesa. Raporto pri ĝi aperas en la ĉefpaĝo de www.ilei.info. Sen ajna modifo la konkurso denove ekas nun kaj alvokas al junaĝaj poetoj.

La Estraro

Septembre ene de la nova Estraro okazis divido de taskoj. Tiu divido, espereble, plu efektivigos la laboron de la Ligo.

Laŭ la venintaj petoj, la Estraro pridiskutas la aferon kun la membrokartoj por siaj membroj. Povus esti elektronikaj ebloj. En diversaj landoj tiaj kartoĵoj estas bezonataj.

La nova estraro povis efike kunsidi skajpe.

Estas planata ĉeesta estrarkunsido de la nova Estraro en Svislando ĉe la prezidanto, eble en januaro aŭ februaro 2019, kiel tio jam okazis en majo 2016. Tion la estraro de ILEI celas komence de la trijara mandato de la estraranoj por efikigi la laboron.

Kapabligo

EIT – Esperanto-Instruista Trejnado

Vidante la bezonojn kaj konstatante la novajn teknikajn eblojn, ILEI en 2018 lanĉis tri programojn EIT. Ĉiuj tri enhavis la samajn partojn: retan kurson ĉe www.edukado.net kaj ĉeestan semajnon. La unua okazis bone kaj finiĝis en Madrido okaze de nia 51-a Kongreso. Tie tri personoj finis la studadon kaj diplomiĝis, aŭ preskaŭ atingis la finon. La dua kurso devis esti nuligita. La tria survojas, ĝi koncernas afrikanojn. Tie okazas diversaj malfacilaĵoj: unue la retaliro, manko je komputilo, pago en retkafejo, ne bona konekto, ne eblo elŝuti dokumentojn aŭ sendi taskojn. Plie la testmaniero per elekteblaj respondoj ne estas kutima en Afiko; precizaj respondoj al precizaj demandoj ne venas kaj la partorenantoj penas kontentigi la postulojn de la kurso. De tiu grupo nun restas ses instruistoj, por kiuj ILEI nun esploras pri solvo. Konklude la rezulto de EIT estas magra kaj tristiga. Tamen estas la unua provo, kiu evidentigis la ĉefajn problemojn kaj tial multe instruis al la Ligo mem pri evoluigo de ĝia ĉefa tasko.

Septembre la Prezidantino Mireille Grosjean dissendis tra kanaloj de ILEI alvokon pri la planata unua sesio de KER-ekzamenoj en Afiko, en Kotonuo, Benino, la 5-an de novembro 2018. Tio estas komuna projekto de ILEI kaj de la Komisiono pri Ekzamenoj de UEA cele al kapabligo de afrikaj samideanoj.

Komisionoj, sekcioj, reprezentantoj kaj kontaktpersonoj

Dum la ILEI-kongreso en Madrido la Komitato akceptis **du novajn sekciojn**: en **Senegalo** kaj en **Armenio**. Gratulojn al niaj kolegoj-samideanoj!

Pro la postuloj de EU pri privateco ILEI devis forpreni la nomojn kaj adresojn de la sekiestroj kaj reprezentantoj kaj kontaktpersonoj el sia paĝaro www.ilei.info. La prezidanto informis ĉiujn pri la paŝo kaj demandis, ĉu ili konsentas pri aperigo de donitaĵoj pri ili. Aro da pozitivaj respondoj venis, baldaŭ la paĝo en la retejo denove aperos kun la nomoj kun konsento de ĉiu unuopulo.

Internacia Pedagogia Revuo (IPR)

Ĉijare ILEI kunlabore kun LIBE – la Ligo Internacia de Blindaj Esperantistoj – decidis krei la adekvatan formaton de IPR kaj JA por blinduloj. La redaktoro Jozefo Nemeth kaj Sebastian Cyprych, la ILEI komisiito pri membroprizorgado pretigis la taŭgan formaton. Reago de LIBE-anoj alvenis tute pozitive.

Granda danko iru al la redaktoro Jozefo Nemeth.

Juna Amiko (JA)

Dum la ILEI-kongreso en Madrido kreiĝis laborgrupo por trakti diversajn aspektojn de la revuo: la deficiton de la papera versio, kaj nivelon de la lingvo, por ke ĝi pli bone trafu sian celpublikon – Esperanto-lernantojn, komencantojn de ĉiu aĝo, kiuj bezonas facilan, kompreneblan lingvon. La laboro komenciĝis perrete aŭtune. Granda danko iru al la redaktoro Stano Marcek.

ILEI en la Reto

Daŭras la informado pri la Ligo tra diversaj ret-kanaloj. Regule aperas komentoj de niaj membroj, kio tre ĝojigas la Estraron. Dankon al niaj kolegoj!

Kunlaboro kun UEA

ILEI informis la Estraron de UEA pri gravaj decidoj ene de sia Estraro rilate al la Ligo. Same UEA regule sendas informojn al la prezidanto de ILEI, kiu plu dividas ilin kun la estraro. Do informfluo bone fluas.

Kontaktoj kun aliaj enmovadaj institucioj

ILEI fiere povas konstati, ke klopodoj por ebligi al blindaj esperantistoj legadon de IPR kaj Juna Amiko finfine rezultiĝis. LIBE-estraro decidis pagi kvin kotizojn por elektronika versio de "Internacia Pedagogia Revuo" kaj sep por "Juna Amiko". La redaktoro de IPR Jozefo Nemeth kaj la ILEI komisiito pri membroprizorgado Sebastian Cyprych kun helpo de Radojica Petrović produktis la simplatekstajn elektronikajn versiojn de ambaŭ revuoj. Gratulojn al niaj kolegoj!

Kontaktoj kun ekstermovadaj institucioj

La ĝenerala direktorino de **UNESKO** Audrey Azoulay sendis sian salutmesaĝon al UK en Lisbono. Kvankam la adreso estas UEA, tamen tiu salutmesaĝo aperis danke al la iniciato de nia Prezidantino Mireille Grosjean, kiu skribis al Sinjorino Azoulay unue por gratuli ŝin pro elektiĝo en novembro 2017, kaj due raportis al ŝi pri ambaŭ kongresoj kaj diversaj agadoj de la Esperanto-movado paralele al la celoj de UNESKO, kaj petis salutadon de UNESKO. Do, denove gratulojn iru al Mirejo!

Danke al la efika kaj longdaŭra laboro de nia kolego Germain Pirlot en Belgio, niaj membroj respondas al enketoj, kiuj riĉigas la revuon de la belga sekcio de **AEDE**, Asocio de Eŭropaj Instruistoj. Estus bone, ke niaj eŭropaj membroj membriĝu en la sekcioj de AEDE en sia lando kaj provu krei kontaktojn en la stilo, kiun Germain Pirlot trovis: ne trudi Esperanton, sed uzi ĝin por kolekti informojn.

En la sama stilo nia Prezidanto kontribuis al riĉigo de statuo en **Neuchâtel, Svislando**, kiam la skulptisto volis esprimi itallingvan frazon en plej diversaj lingvoj. (Erri de Luca: “Ŝajnas al mi, ke per la multobligo de la lingvoj la horizontoj multobliĝas ».) Ŝi uzis la kutimajn kanalojn de ILEI kaj kolektis la frazon en proks 50 lingvoj. Per tiaj agadoj nia lingvo brilas kaj kontentigas la lokajn organizantojn. Plej bona varbado!

Dankoj

Ĉiuj personoj, kiuj iom iel kontribuas al la mastrumado kaj vivo de la Ligo ricevu elkorajn dankojn!

Sekretario de ILEI:

Elena Nadikova

Prezidanto de ILEI:

Mireille Grosjean

2018-10-15